

文獻通考

經籍考


漢書門類			
六〇〇	二	函	號
五	架		
一四〇	冊		



內閣文庫			
漢書	六〇〇	二	函
號	冊	架	類
八	冊		

百九十九卷二百一

內閣文庫			
番號	漢	600	
冊數	140	(85)	
函號	294	6	

百四十一





文獻通考卷之一百九十九

鄱陽馬端臨貴與著

經籍考

史傳記

魏公語錄一卷

陳氏曰與別錄小異而實同別錄分四卷此總而一篇先後次第亦不同而末一則別錄所無

姑並存之

魏公別錄四卷

晁氏曰其門人王品叟記其言論事實然以國史考之其歲月往往抵牾蓋失之誣也

杜祁公語錄一卷

陳氏曰不知何人作

文潞公私記一卷

晁氏曰皇朝文彥博所撰元豐初王堯臣之子同老以其父至和中所撰立英宗為皇子詔草上之且曰時宰相文彥博富弼知狀神宗以問彥博彥博具以實對至元祐中賈易為言官為韓忠彥爭辯其事彥博乃著此其後云自古唯霍禹云縣官非我家將軍不得至此揚復恭自稱定策國老謂昭宗為門生天子鞅鞅不道之言卒被夷滅

陳氏日記至和請建儲及元豐褒賞事

潛德錄一卷

晁氏曰皇朝呂晦獻可之孫撰記其祖乞立英宗言章

嘉祐名臣傳五卷

晁氏曰張唐英傳仁宗朝賢臣五十餘人王氏揮塵錄曰唐英天覺同胞兄仕至殿中侍御史嘗述仁宗政要上于朝所謂嘉祐名臣傳特政要中一門耳

孔子編年三卷

晁氏曰皇朝孔傳取左氏國語公羊史記及它書所載孔子事以年次之自生至卒

東家雜記二卷

晁氏曰亦孔傳撰孔子四十七代孫也纂其家

舊聞軼事于此書

陳氏曰歷代追崇先聖故事及孔林古跡

晁以道揚雄別傳一卷

晁氏曰從父詹事公撰雜取諸書所載雄逸事
為一編係之以贊

唐質肅遺事一卷

陳氏曰無名氏所記唐介子方事也

韓莊敏遺事一卷

陳氏曰秘書丞韓宗武文若撰記其父丞相績
玉汝事末亦雜載它事宗武即少年遇洋客者
也年八十二乃卒此編亦載其詩云熙寧間得
異疾與神物遇

范忠宣言行錄二十卷

陳氏曰不著名氏其家所錄也

范太史遺事一卷

陳氏曰翰林學士范冲元長記其父事

傅獻簡佳語一卷

陳氏曰不知何人所作記傅堯俞所談

杜公談錄一卷

陳氏曰雷繹杜師益等錄其父務滋之言王廣
淵作序

豐清敏遺事一卷

陳氏曰給事中章貢李朴先之撰記豐稷相之
事朱熹為之後序

宗忠簡公遺事三卷

陳氏曰不著名氏錄留守開封事亦其家子孫所為

後村劉氏序曰公遺事行世已久今連帥寶謨

王公鎔公之外孫復稱採摭舊聞以傳翼之

呂忠穆家傳一卷 逢辰記一卷

遺事一卷

陳氏日記建炎丞相呂頤浩元直事孫昭問刻

之廣德軍

褒德集二卷 易學辨惑一卷

陳氏曰邵伯溫撰錄其父告命謚議行狀墓誌之屬辨惑述傳授原流辨鄭夬之妄

呂氏家塾記一卷

陳氏曰侍講呂希哲原明撰

桐陰舊話十卷

陳氏曰吏部尚書潁川韓元吉無咎撰記其家世舊事以京師第門有桐木故云元吉門下侍郎維之四世孫也

趙康靖日記一卷

陳氏曰參政睢陽趙槩叔手所記治平乙巳丙午間在政路初事

劉忠肅公行年記一卷

陳氏曰丞相東平劉摯莘老撰

文昌雜錄六卷

陳氏曰主客郎中南京龐元英懋賢撰官制初
行元英為郎在省四年記一時見聞及古今典
故可觀覽元英丞相莊敏公籍之子

聞見近錄一卷

陳氏曰宗正丞三槐王鞏定國撰

辯欺錄一卷

陳氏曰韓忠彥記其父嘉祐末命事與文富諸
公辯

回天錄一卷

陳氏曰宣教郎秦湛處度撰記呂好問圍城中
事好問除右丞訓詞有回天之力語故以名錄
後有好問謝其祖公著復官表及遺表

盡忠補過錄一卷

陳氏曰修職郎穆伯芻撰記張孝純在偽齊時
所上本朝書

吳丞相手錄一卷

陳氏曰吳敏元忠撰記靖康初元事

岳飛事實六卷辨誣五卷

陳氏曰飛之孫珂撰

丁卯實編一卷

陳氏曰成忠郎李珙撰誅曦之功揚巨源為多
安丙忌而殺之珙為作傳上之于朝以昭其功
而申其冤

孔子編年五卷

陳氏曰新安胡仔元任撰其父待制舜陟命仔采撫經傳為之

諸葛武侯傳一卷

陳氏曰侍講張栻撰以陳壽作史私且陋哀集他傳及裴松之所注為此傳而削去管樂自許一則朱晦翁以為不然又為後論以達其意謂其體正大而學未至使得游洙泗之門所就不止此

韓文公曆官記一卷

陳氏曰新安張敦頤撰頗疏略其最誤者序言擒吳元濟出牛元翼為一事此大謬也為裴度行軍司馬在憲宗元和時奉使鎮州王庭湊在

穆宗長慶時

歐公本末四卷

陳氏曰呂祖謙編蓋因觀歐陽公集攷其歷仕歲月同官同朝之人略著其事迹而集中詩文亦隨事附見非獨歐公本末而時事時賢之本末亦大略可觀矣故以八傳記類

皇祐平蠻記二卷

陳氏曰殿中丞馮炳撰記儂智高事

孫威敏征南錄一卷

陳氏曰學士睢陽滕甫元發撰言平南之功皆本孫沔元規狄青之至莫能出其右者余靖歸美於青非實也甫時通判潮州

隋廝囉傳一卷

陳氏曰不著作者

陝西聚米圖經五卷

陳氏曰閭門通事舍人雒州趙珣撰珣父振博州防禦使久在西邊珣訪得五路徼外山川道里康定二年為此書韓魏公經略言于朝詔取其書召見執政呂許公宋莒公言用兵以來策士之言以千數無如珣者擢涇原都監定川之敗死焉珣勁特好學恂恂類儒者人皆惜之

元豐平蠻錄三卷

陳氏曰金部員外郎知鳳翔府家安國撰記乞弟韓存寶事

元祐分疆錄三卷

陳氏曰直龍圖閣京兆游師雄景叔撰元祐初議弃西邊四寨執政召師雄問之對曰先帝弃之可也主上弃之則不可且示弱夷狄反益邊患爭之甚力不聽卒棄之四寨者葭蘆米脂浮屠安疆也夏人以事出望外萌侵侮之心連年犯順皆如師雄所料此書前三卷記當時論辨本末後一卷行實不知何人作也是歲師雄被命行邊請以便宜行事夏人與鬼章謀寇熙河師雄說劉舜卿出師种誼遂破洮州禽鬼章以獻其功偉矣元祐諸老固欲休兵息民師雄言既不行功復不賞殆以專反熙豐失於偏滯終

成紹述之禍亦有以也師雄治平二年進士
青唐錄一卷

陳氏曰右班殿直李遠撰元符中取邈川青唐
已而皆棄之遠紹聖武舉人官鎮洮奉檄軍前
記其經歷見聞之實粲然可觀

交趾事迹十卷

陳氏曰知新州趙勰撰

占城國錄一卷

陳氏曰不著名氏

雞林類事三卷

陳氏曰不著名氏

政和大理入貢錄一卷

陳氏曰右迪功郎錢塘周邦撰其祖種為集賢
修撰知桂州時歸明入黃璘招來大理國入貢
詔種考究其真偽種言偽妄不可憑乞依熙寧
故事支馬價發還璘至京師力主其事種落職
奉祠久而覺其詐乃改正復職知廣州

安南表狀一卷

陳氏曰紹興二十五年李天祚進貢自靖康二
年以後至是始通也

邊和錄五卷

陳氏曰承議郎河東陳伯彊撰載胡世將承公

宣撫川陝事

建炎德安守禦錄三卷

陳氏曰郡丞東平劉荀子編次建炎初高密陳規元則守德安禦羣盜事迹功狀規後守順昌與劉錡共成却敵之功者也以樞密直學士知廬州而卒

淮西從軍記一卷

陳氏曰不著名氏記紹興十年金虜敗盟淮西諸帥守禦事

順昌破敵錄一卷

陳氏曰不著名氏記劉錡信叔守禦戰勝本末

滕公守台錄一卷

陳氏曰不著名氏睢陽滕膺子勤為台州戶曹方臘之亂仙居人呂師囊應之攻城甚急膺佐

太守備禦卒全一城郡人德之至今廟食行狀事實聚見此篇膺後至直秘閣京西漕而終

二楊歸朝錄一卷

楊堯弼楊載紹興八年所與撻鞬兀朮書時偽齊初廢也末有探報虜事數十條

逆臣劉豫傳一卷

陳氏曰楊堯弼等撰二楊事迹當考前錄題街稱宣義郎迪功郎並為大總管府官屬此傳堯弼為右從事郎載為右迪功郎

許右丞行狀一卷

陳氏曰吏部員外郎許忻撰許公翰字崧老襄邑人為尚書右丞忻其弟也

李忠定行狀一卷

陳氏曰通判洪州李綸撰其兄丞相綱伯紀事狀葉適正則所作謚議附于後

翟忠惠家傳一卷

陳氏曰翟耆年伯壽述其父汝文公巽事實忠惠者私謚也耆年實邢恕外孫

艾軒家傳一卷

陳氏曰莆田林成季述其季父工部侍郎光朝謙之事實

夾漈家傳一卷所著書目附

陳氏曰莆田鄭翁歸述其父樵漁仲事迹翁歸年八十歲老貧不競頃佐莆郡時猶識之

葉丞相行狀一卷

陳氏曰閣學廬陵楊萬里廷秀撰丞相莆田葉顥子昂軋道丁亥以冬雷罷相至建寧而薨

謝修撰行狀墓誌一卷

陳氏曰昭武謝師稷務本奉使閩部有惠愛沒而民祠之行狀里人黃適景聲撰墓誌永嘉陳謙益之撰其廟曰昭應

朱侍講行狀一卷

陳氏曰奉議郎三山黃鞅直鄉撰其高第弟子且子壻也

紫陽年譜三卷

陳氏曰朱侍講門入通判辰州昭武李方子公

晦撰

篤行事實一卷

陳氏曰丞相趙汝愚子直編其父善應彥遠事而羅願朱熹所撰行狀墓銘及諸賢哀詞題跋之屬萃為一編篤行者陳福公題其墓云爾呂太史跋語有云處者易持出者難工朱侍講取其意以為銘所以勉其子之意深矣

趙丞相行實一卷附錄二卷

陳氏曰知靜江府趙崇憲履常編集忠定長子也其一時諸賢祭文挽歌與嘉定更化之後昭雪誣枉改正史牒本末皆見附錄

趙忠定行狀一卷續議一卷

陳氏曰知光州鄱陽柴中行與之撰其謚議允濟全之揚方子直所為也

倪文節言行錄三卷遺奏誌狀碑銘謚議一卷

陳氏曰戶部郎中倪祖常子武輯其父尚書遺事行狀錫山蔣重珣良貴撰碑銘臨邛魏了翁華甫撰

趙華文行狀一卷

陳氏曰文林郎趙山李燔敬子撰忠定之子吏部崇憲履常也

八朝名臣言行錄二十四卷

陳氏曰侍講朱熹撰以近代文集及傳記載本朝名臣言行掇取其要輯為此錄前五朝五十

五人後三朝四十二人

中興忠義錄三卷

陳氏曰龔頤正撰自建炎至紹興辛巳上自李若水劉韜貴臣名士下及一婦人卒伍之微皆錄之

孝史五十卷

大學博士新喻謝諤昌國撰集曰君紹五后德一宗表五臣傳三十五文類二夷附一諤後至御史丞淳熙名臣樂易君子也

孝行錄三卷

陳氏曰京兆胡訥撰始得此書不知訥何人也所記多國初人已而知其為安定先生翼之之

父仕為寧海節度推官

古今孝悌錄二十四卷

陳氏曰廬陵王紹圭唐卿撰

廉吏傳十卷

陳氏曰成都費樞伯樞撰自秦至唐凡百十有四人宣和乙巳為序

南陽先民傳二十卷

陳氏曰題南陽王襄元祐癸酉歲序所記鄧州人物自百里奚直不疑而下至唐范傳正韓翃凡一百六十八人

典刑錄十二卷

陳氏曰苕溪吳宏編凡五十二門大略於言行

錄中抄出

近世厚德錄四卷

陳氏曰題百鍊真隱李元綱國紀編沈濬道原為作序

救荒活民書三卷

陳氏曰從政郎鄱陽董燭編進燭紹熙五年進士嘗知瑞安縣

仁政活民書二卷

陳氏曰秀州司戶會稽丁銳集

好還集一卷

陳氏曰秀水婁伯高元龍編報應之事為十門先賢施仁濟世錄一卷

陳氏曰奉化丞山陰諸葛興編凡十門皆本朝諸賢事實也

莆陽人物志三卷

陳氏曰知興化軍永嘉林紘文伯撰以圖志不叙人物故特為是編莆壤地褊小而人物特盛卧遊錄一卷

陳氏曰呂祖謙撰晚歲病廢卧家取史傳所載古今入境勝處錄之時以宗少文卧遊之語實諸卷首

上庠錄十卷

陳氏曰光州助教呂榮義撰雜記京師大學故事

上庠後錄十二卷

陳氏曰三山周士貴撰記中興大學事頗疏略
昭明太子事實二卷

陳氏曰知池州趙彥博富文編昭明廟食於池
頗著靈響元祐始賜額曰文孝

祠山家世編一卷

陳氏曰詹仁澤曾樵編輯廣德橫山神張王事
跡

海神靈應錄一卷

陳氏曰永嘉貢士陸維則撰太守韓彥直子温
為之序初元祐中守直龍圖閣范岫夢海神曰
吾唐李德裕也郡城東北隅海仙壇之上有廟

初不知其為何代人岫明日往謁其像即夢中
所見自是多響應然封爵訓詞惟曰海神而已
鄂國金佗稗編二十八卷續編三十卷

陳氏曰岳珂撰

宋登科記三卷

晁氏曰皇朝登科人名氏未詳何人所撰

唐宋科名分定錄三卷

晁氏曰不題撰入元符間所著書也序云己卯
歲得張君房所誌唐朝科場故事今續添五代
及本朝科名分定事迄於李常寧云

大宋登科記三十二卷

陳氏曰洪适編始吳興郡學有鋟板不分卷第

止述進士一科迨始做姚康錄制舉詞科自建
隆庚申迄紹興庚辰二萬三千六百人有奇為
二十卷自後皆續書之

中興登科小錄三卷姓類一卷

陳氏曰通判徽州江都李椿撰新安舊有登科
記但逐榜全錄姓名而已椿家藏小錄自建炎
戊申至嘉熙戊戌節次取名字鄉貫三代諱刊
之後以韻類其姓凡一萬五千八百人有奇太
守吳興倪祖常子武刻之以備前記之闕文

乘軺錄一卷

陳氏曰知制誥祁陽路振子發撰祥符中使契
丹歸進此錄事見其傳

奉使別錄一卷

陳氏曰河南富弼彥國撰慶曆使契丹歸為語
錄以進機宜事節則具于此錄又一本有兩朝
往來書附于末

劉氏西行錄一卷

陳氏曰直昭文館保塞劉渙中章撰按康定二
年朝廷議遣使通河西唃氏渙以屯田郎知晉
州請行以十月十九日出界慶曆元年三月十
日回秦州此其行紀也唃氏自此與中國通而
元昊始病於牽制矣渙後換刺史歷典數州至
留後以工部尚書致仕

契丹講和記一卷

陳氏曰不著名氏載契丹初講和本末末有慶曆增幣後北虜誓書

慶曆正旦國信語錄一卷

陳氏曰余靖慶曆三年使虜所記

熙寧正旦國信錄一卷

陳氏曰天章閣待制竇卞熙寧八年使虜所記
接伴送語錄一卷

陳氏曰集賢校理沈季長熙寧九年接送伴虜

使耶律運所記

使遼見聞錄二卷

陳氏曰尚書膳部郎中李罕撰

宣和使金錄一卷

陳氏曰太常少卿安陸連南夫鵬舉吊祭阿骨打奉使所記時宣和六年
奉使雜錄一卷

陳氏曰紹興十二年何鑄使虜所錄禮物名銜表章之屬

館伴目錄一卷

陳氏曰無名氏紹興二十四年

隆興奉使審議錄一卷

陳氏曰左奉議郎雍希稷堯佐撰隆興二年編修官胡昉閣門祗候楊由義使金虜軍前審議海泗唐鄧等事不屈而歸希稷其禮物官也所抗辯應對之語多出由義

攬轡錄一卷

陳氏曰吳郡范成大至能軋道六年使虜所記聞見

北行日錄一卷

陳氏曰參政四明樓鑰大防乾道己丑待次温州教授以書狀官從其舅汪大猷仲嘉使虜紀行

乾道奉使錄一卷

陳氏曰參政諸暨姚憲令則乾道壬辰使虜日記

奉使執禮錄一卷

陳氏曰進士鄭儼撰淳熙己酉中書舍入莆田

鄭僑惠叔使虜賀正會其主病篤欲令於閣門進國書僑不可已而雍殂遂回

使燕錄一卷

陳氏曰尚書戶部郎龍游余嶸景瞻撰嘉定辛未嶸使虜賀生辰會有北師行至涿州定興縣而回

右傳記

文獻通考卷一百九十九

文獻通考卷之三百

鄱陽馬端臨 / 貴與 著

經籍考

史 偽史霸史

華陽國志十二卷 一百二十卷

晁氏曰晉常璩撰華陽梁州地也記漢以來巴蜀人物呂微仲跋云漢至晉初四百載間士女可書四百人亦可謂盛矣復自晉至周顯德僅亡百載而史所紀者無幾人忠魂義骨與塵埃同沒何可勝數豈不重可歎哉

陳氏曰志巴蜀地理風俗人物及公孫述劉焉劉璋先後主以及李特等事跡末卷為序志云

文獻通考卷之三百

肇自開闢終乎永和三年

九州春秋九卷

陳氏曰晉司馬彪紹統撰記漢末州部之亂司
異徐兗青荆楊涼益幽凡盜賊僭叛皆紀之

淝上英雄小錄二卷

陳氏曰信都鎬撰所錄楊行密將吏有勲名者
四十人其二十四人皆淝人餘諸道人又有僧
道漁樵之屬十人錄其小事故名小錄

江淮異人錄二卷

陳氏曰吳泚撰所記道流俠客術士之類凡二
十五人

南唐烈祖開基誌七卷

陳氏曰南唐滁州刺史王顏撰起天祐乙丑止
昇元癸卯合三十九年

南唐烈祖實錄十三卷

陳氏曰南唐史館修撰高遠撰闕第八第十二
卷遠又嘗為吳錄二十卷而徐鉉鄭文寶皆云
開寶中遠始緝昇元以來事書未成而疾焚其
草故事多遺落

江南錄十卷

晁氏曰皇朝徐鉉等撰鉉等自江南歸朝奉詔
集李氏時事王介甫嘗謂鉉書至亡國之際不
言其君之過但以曆數存亡論之於春秋箕子
之義為得也雖然潘佑以直見殺而鉉書佑死

以妖妄殆與佑爭名且取其善不及佑故匿其忠汚之以罪耳若然豈唯厚誣忠臣其欺吾君不亦甚乎世多以介甫之言為然獨劉道原得佑子華所上其父事跡略與江南錄所書同乃知鉉等非欺誣也

陳氏曰徐鉉湯悅撰二人皆唐舊臣故太宗命之撰次悅即殷崇義避宣祖諱并姓改焉

南唐近事二卷

晁氏曰皇朝鄭文寶編記李氏三主四十年間雜事

陳氏曰起天福己酉終開寶乙亥然泛記雜事實小說傳記之流耳

江南別錄四卷

晁氏曰皇朝陳彭年撰偽吳偽唐四主傳也

江表志三卷

晁氏曰鄭文寶撰序言徐鉉湯悅所錄事多遺落無年可編然前錄固為略而尤以年月記事今此書亦止雜記如事實之類耳近事稱太平興國二年丁丑今稱庚戌者大中祥符三年

江南野史二十卷

晁氏曰皇朝龍克撰凡八十四傳

江南館載二卷

陳氏曰不著姓名序言徐鉉始奉詔為江南錄其後王舉路振陳彭年楊億皆有書大槩六家

皆不足以史稱而龍究為尤甚熙寧八年得鄭君所述於楚州其事迹有六家所遺或小異者刪落是正取百九十五段以類相從鄭君者莫知何人

南唐書三十卷

陳氏曰陽羨馬令撰序言其祖太博元康世家金陵多知南唐故事未及撰次今纂先志而成之實崇寧乙酉其書略備記傳體亦言徐湯之踈略云

新修南唐書十五卷

陳氏曰寶謨閣待制山陰陸游務觀撰采獲諸書頗有史法

蜀桂堂編事二十卷

晁氏曰偽蜀楊九齡撰雜記孟氏廣政中舉試事載詩賦策題及知舉登科入姓氏且云科舉起於隋開皇前陋者謂唐太宗時非也
外史擣杙十卷

晁氏曰皇朝張唐英次公撰稱王建孟知祥父子四世八十年比之公孫述輩最為以遠其間善惡有可為世戒者路振之書未備治平成此書以補其遺凡五代史及皇朝日曆所書皆略之温公修通鑑搜羅小說殆遍未嘗取此書蓋多舛舛如光大至二年之類是也

陳氏曰唐英自號黃松子商英之兄也

前蜀記事二卷

陳氏曰偽蜀學士毛文錫平珪撰起唐明庚子
蓋天福甲子凡二十五年文錫唐太僕卿龜範
之子十四登進士第入蜀仕建至判樞密院隨
行入洛而卒

後蜀記事十卷

陳氏曰直史館太常博士董淳撰惟記孟昶事
吳越備史九卷

陳氏曰吳越掌書記范垌巡官林禹撰按中興
書目其初十二卷盡開寶三年後又增三卷至
雍熙四年今書止石晉開運比初闕三卷
吳越備史遺事五卷

陳氏曰全州觀察使錢儼撰倣之弟也其序云
備史亦其所作托名林范而遺名墜迹殊聞異
見闕漏未盡者復為是編時皇宋平南海之二
年吳興西齋序蓋開寶五年也儼以三年代其
兄僊刺湖州

閩中實錄十卷

陳氏曰周顯德中揚州求貞縣令蔣文惲記閩
王審知父子及將吏儒士僧道事迹末亦略及
山川土物

閩王列傳一卷

陳氏曰秘書監晉江陳致雍撰二世七主通六
十年

閩王事迹一卷

陳氏曰不知何人作末稱光啓二年至天聖元年一百三十八年所記頗詳

三楚新錄三卷

陳氏曰知桂州脩仁縣周羽冲撰上卷為湖南馬殷中卷為武陵周行逢下卷為荆南高季興湖南故事十卷

陳氏曰不知作者記馬氏至周行逢事館閣書目作十三卷蓋為列傳十三篇其實十卷也文辭鄙甚

五國故事二卷

陳氏曰不知作者記吳蜀閩漢諸國事

九國志五十一卷

晁氏曰皇朝路振子發撰雜記吳越唐前後蜀東漢南漢閩楚凡十國

陳氏曰各為世家列傳凡四十九卷末二卷為北楚言高季興事張唐英所補撰

十國紀年四十二卷

晁氏曰皇朝劉恕道原撰温公序云渙之子也博學強記同修通鑑史事之紛錯難治者以諉恕宋次道知亳州家多書恕往借觀之目為之瞽性剛介初與王安石善及改新法言其非遂與之絕卒年四十九所謂十國者一王蜀二孟蜀三吳四唐五吳越六閩七楚八南漢九荆南

十北漢温公又題其後云世稱路氏九國志在
五代之史中最佳此書又過之以予考之長於
考異同而拙於屬文其書國朝事皆曰宋而無
所隱諱意者各以其國為主耳
天下大定錄一卷

陳氏曰殿中丞通判桂州王舉撰景祐間入始
高季興終劉繼元其所記踈略獨江南稍詳本
十卷今但為一卷恐非全書也

虜廷雜記十卷

晁氏曰契丹降人趙志忠撰記虜廷雜事始於
阿保機迄耶律宗真李清臣云志忠仕虜為中
書舍人得罪來歸上此書及契丹地圖言虜中

甚詳

陰山雜錄十六卷 契丹錄一卷

陳氏曰不著名氏莆田鄭氏書目云趙志忠撰
歐公歸田錄云志忠本華人自幼陷虜為人明
敏在虜中舉進士至顯官歸國能述虜中君臣
世次山川風物甚詳今觀此書可以槩見矣其
首一卷名契丹錄

契丹疆宇圖一卷

陳氏曰不著名氏錄契丹諸夷地及中國所失
地

遼四京紀

陳氏曰亦無名氏曰東京中京上京燕京

燕北雜錄五卷西征寨地圖附

陳氏曰思卿武珪記嘉祐六年宮苑使知雄州趙某進于朝珪亦自契丹逃歸事見國史傳

匈奴須知一冊

晁氏曰契丹歸明人田緯編次錄契丹地理官制

辨鳩錄一卷

陳氏曰不著名氏契丹譯語也凡八篇

虜庭須知一卷

陳氏曰左藏庫副使知安肅軍陳昉撰熙寧元年集賢校理胡穆為之序凡二十一條目

載斗奉使錄二卷

晁氏曰皇朝王曙撰景德三年為契丹主生辰使祥符二年為吊慰使所錄也

生辰國信語錄一卷

晁氏曰皇朝寇瑊與康德輿天聖六年使契丹賀其主生辰往返語錄并景德二年至天聖八年使副姓名及雜議于後

張浮休使遼錄二卷

晁氏曰皇朝元祐甲戌春張舜民被命為回謝大遼吊祭使鄭介為副錄其往返地里及話言也舜民字芝叟自號浮休居士

北遼遺事二卷

晁氏曰不題撰人蓋遼人也記女真滅遼事序

云遼國自阿保機創業於其初德光恢廓於其後吞滅諸蕃割據漢界南北開疆五千里東西四千里戎器之備戰馬之多前古未有子孫繼統二百三十餘年迨至天祚失御女真稱兵十二年間舉國土崩古人謂得之難而失之易非虛言耳

陳氏曰燕山史愿撰一名金人亡遼錄

金虜節要一卷 一作三卷

晁氏曰陷虜人所上也記金人初內侮止紹興十年共十六年事頗詳實

陳氏曰右從事郎充人張匯東鄉撰宣和中隨父官保州陷虜十五年至紹興十年歸朝

金虜志二卷 又一卷

陳氏曰承奉郎張棣撰淳熙中歸明人記虜中事頗詳又一卷不著名氏似節略張棣書其末又雜錄虜界事宜及逆亮以後事

松漠記聞二卷

陳氏曰徽猷閣直學士番易洪皓光弼撰皓奉使留虜中錄所聞雜事

征蒙記一卷

陳氏曰金人明威將軍登州刺史李大諒撰建炎鉅寇之子隨其父成降虜者也

偽楚錄二卷 偽齊錄二卷

陳氏曰並不著名氏

金人南遷錄一卷

陳氏曰稱偽著作郎張師顏撰初見此書疑非北人語其間有曉然傳會者或曰華岳所為也近扣之汴人張總翼則云歲月皆抵牾不合益證其妄

西夏須知一卷

晁氏曰皇朝劉溫潤守延州日編錄偽境雜事陳氏曰凡十五條目

蕃爾雅一卷

晁氏曰不載著人姓名以夏人語依爾雅體譯以華言

夏國樞要二卷

晁氏曰皇朝孫異纂記夏虜兵屯會要土地肥磽井泉湧洄穀粟窖藏酋豪姓氏名位司存與夫咸池之完缺風俗之所向編為兩帙上之朝西域志十二卷

晁氏曰唐僧玄奘撰奘西遊天竺求佛書既歸記其所歷諸國風俗其自序云自黑領以西皆土著尚東左椎務田畜重財賄嫁娶無禮獨天竺則異別記於後云或云玄奘譯大總持寺僧辨機撰

鷄林志三十卷

晁氏曰皇朝崇寧中王雲編次崇寧中劉達吳拭使高麗雲為書記官既歸攬輯其會見之禮

聘問之辭類分為八門

陳氏曰自元豐創通高麗以後事實皆詳載之海外使程廣記三卷

陳氏曰南唐如京使章僚撰使高麗所記海道及其國山川事跡物產甚詳史虛白為作序稱己未十月蓋本朝開國前一歲也

高麗圖經四十卷

陳氏曰奉議郎徐兢明叔撰宣和六年路允迪傳墨卿使高麗競為之屬歸上此書圖其形事為之說今所刊不復有圖矣兢鉉之後

南詔錄三卷

陳氏曰唐嶺南節度巡官徐雲虔撰乾符中邕

中遣雲虔使南詔所作上卷記山川風俗後二卷紀行及使事

雲南行記二卷

晁氏曰唐韋齊休撰齊休長慶三年從韋審規使雲南記其往來道里及其見聞序謂雲南所以能為唐患者以開道越雋耳若自黎州之南清溪關外盡斥棄之疆場可以無虞不然憂未艾也及唐之亡禍果由此本朝棄雋州不守而遂無邊患以此論之則齊休之言可不謂善哉

雲南志十卷

晁氏曰唐樊綽撰咸通中南詔數寇邊綽為安南宣慰使纂八詔始末名號種族風俗物產山

川險易疆境接聯聞于朝

至道雲南錄三卷

晁氏曰皇朝辛怡顯招蜀賊李順既平餘黨竄入雲南雷有終募怡顯招出之至道初歸因書其所歷成此書

陳氏曰怡顯入雲南招李順餘黨因賜蠻酋告勅而遂為此錄天禧四年自序稱左侍禁知興花軍或云此書妄也余在莆田視壁記無怡顯名字恐或然

皇祐平蠻記一卷

晁氏曰皇朝馮炳撰記儂智高叛朝廷遣狄青平之

南蠻錄十卷

晁氏曰未詳撰入熙寧間交趾叛朝廷議討之或纂歷代南蠻事迹及便宜上之

諸蕃志二卷

陳氏曰福建提舉市舶趙汝适記諸蕃國及物貨所出

右偽史霸史

劉氏史通二十卷

晁氏曰唐劉知幾撰知幾長安神龍間三為史官頗不得志乃以前代書史序其體法因習廢置掇其得失述作曲直分內外篇著為評議備載史策之要當時徐堅深重之云居史職者宜

置坐右玄宗朝詔其家錄進上讀而善之宋子
京稱唐舊史之文猥穰不綱謂知幾工訶古人
而拙於用已觀此書知子京之論不誣前世史
部中有史抄類而集部中有文史類今世抄節
之學不行而論說者為多故自文史類內摘出
論史者為史評附史部而廢史抄云
陳氏曰其著書亦博矣史通者漢封司馬遷後
為史通子亦兼白虎通之義也

史通析微十卷

晁氏曰唐柳璨炤之撰璨以劉子玄史通妄誣
聖哲評湯之德為偽迹論桀之惡為厚誣謗周
公云不臣褒武庚以徇節其甚至於彈劾仲尼
因討論其舛謬共成五十篇蕭統云論則析理
精微故以為名乾寧四年書成唐史云璨公綽
族孫少孤貧好學著史通析微時或稱之起布
衣至於相不四歲按唐紀相璨在天祐改元則
書成猶未仕也

史例三卷

陳氏曰唐右補闕劉餗鼎卿撰知幾次子也

歷代史贊論五十四卷

晁氏曰未詳撰人纂史記迄五代史臣贊論
歷代史辨志五卷

晁氏曰未詳撰人亦有可觀者凡百許篇序謂
人之志有甚微者不可不辨故以名書

通鑑釋文二十卷

陳氏曰司馬康公休撰溫公之子

通鑑釋文三十卷

陳氏曰左宣義郎眉山史炤見可撰馮時行為之序今考之公休之書大略同而加詳焉蓋因其舊而附益之也

通鑑前例一卷修書帖一卷三十六條四圖共一卷

陳氏曰司馬光記集修書凡例諸帖則與書局官屬劉恕范祖禹往來書簡也其曾孫侍郎及季思哀於一篇又以前例分為三十六條而考其離合稽其授受推其甲子括其卷帙分為四

圖

通鑑問疑一卷

陳氏曰高安劉義仲壯輿纂集其父道原與溫公往復相繼者亦附修書帖後

讀史管見三十卷

陳氏曰禮部侍郎建安胡寅明仲以通鑑事備而義少故為此書議論宏偉嚴正間有感於時事其於熙豐以後接于紹興權姦之禍尤拳拳寓意焉晦庵綱目亦多取之

朱子語錄胡致堂議論英發人物偉然讀史管見乃嶺表所作當時並無一冊文字隨行只是記憶所以其間有抵牾處南軒言管見專為

秦檜設豈有言天下之事而專於一人者先生曰儘有好處但好惡不相掩耳又曰致堂管見方是議論唐鑑議論弱又有不相應處前面說一項事末又說別處去

通鑑論篤三卷

陳氏曰侍講廣漢張拭欽夫撰取通鑑中言論之精確者表而出之多或全篇少至一二語去取甚嚴可以見前輩讀書眼力之高

南北籌邊十八卷

臨江曾三英無愧撰周平園序略曰南渡初士大夫日夜防守江淮計時右正言呂祉帥金陵與其屬吳若陳克著東南防守利便三卷上之

事既詳實文亦條暢其後有尚書郎臨川吳曾著南北征伐編年二十三卷起三國終五代凡古今形勢師旅勝負該貫無遺仍集當時君臣議論為分門事類一十二卷其相謀相應攻守通好可指諸掌視社之書益加詳焉今臨江曾君三英復為南北籌邊十八篇南之攻北其事有九諸葛亮紀瞻褚裒桓溫劉裕宋文帝陳顯達沈慶之吳明徹是也北之圖南其事亦九曹操魏明帝羊祜符堅拓跋太武孝文元英邢巒北齊是也人為一論論指一事皆援昔以證今因迹以求心即成而究敗考古可謂勤而用志可謂切矣

史記音義二十卷

陳氏曰唐崇賢館學士劉伯莊撰貞觀初奉敕講授采鄒誕生徐廣及隋柳頤言音義而為此書

史記素隱三十卷

晁氏曰唐司馬貞撰據徐裴注糾正抵牾援據密綴如東坡辨宰我未嘗從田常為亂蓋本諸貞也

陳氏曰採撫異聞釋文演注末二卷為述贊為三皇本紀世號小司馬史記

附索隱史記一百三十卷

陳氏曰淳熙中廣漢張材介仲刊于桐川郡齋

削去褚少孫所續而附以司馬貞索隱其後江陰耿秉直之復取所削者別刊之

史記正義二十卷

陳氏曰唐諸王侍讀張守節撰開元二十四年作序

崇文總目為漢書學者此最精博

陳伯宣注史記八十七卷

崇文總目唐陳伯宣撰因裴駙說有所未悉頗增損焉然多取司馬氏索隱以為已說今篇殘缺

遷史刪改古書異辭十二卷

陳氏曰倪思撰以遷史多易經語更簡嚴為平

異體當然也然易辭而失其義書事而與經易者多不可以無考故為是編經之外與他書異者亦并載焉

班馬異同三十五卷

陳氏曰倪思撰以班史仍史記之舊而多刪改天抵務趣簡嚴然或刪而遺其實或改而失其本意因其異則可以知其筆力之優劣而又知作史述史之法矣

新校史記一百三十卷

新校前漢書一百卷

新校後漢書九十卷

三史刊誤四十五卷

崇文總目皇朝張觀等校定初秘書丞余靖上言國子監所收史記漢書誤請行校正詔翰林

學士張觀知制誥李淑宋祁與靖海直王洙於崇文院讐對靖等悉取三館諸本及先儒注解訓傳六經小說字林說文之類數百家之書以相參校凡所是正增損數千言尤為精備逾年而上之靖等又自錄其讐校之說別為刊誤四十五卷

漢書問答五卷

崇文總目唐沈遵行撰采諸儒為漢書說者申釋其義有博聞之益然篇第頗差討求未獲闕劉傳以下諸篇

三劉漢書標注六卷

一作一卷

晁氏曰皇朝劉敞原父弟攸貢父子奉世仲馮

撰劉跋嘗跋其書尾云余為學官亳州故中書
劉舍人實為守從容出所讀漢書示余曰欲作
補注未能也然卷中題識已多公之子方山亞
夫錄以相示也

陳氏曰又本題公非先生刊誤其實一書公非
貢父自號漢書自顏監之後舉世宗之未有能
異其說者至劉氏兄弟始為此書多所辨正發
明

呂氏前漢論三十卷

晁氏曰皇朝呂大忠晉伯撰予得其本於銅梁
令呂肇修撰汲陵諸孫也

西漢發揮十卷

晁氏曰皇朝劉涇巨濟撰涇蜀人

西漢決疑五卷

陳氏曰國子司業宛丘王述致君撰一曰失實
二曰引古三曰異言四曰雜證五曰注釋

西漢史抄十七卷

兩漢博議十四卷
中興藝文志陳傅良撰指摘精要裨正闕誤如
制度始末因革則條其大意遺其煩碎而一代
之興衰治體人才紀綱風俗亦略矣博議陳季
雅所撰關涉尤大

東漢刊誤一卷

晁氏曰劉攽貢父撰攽序英宗讀後漢書見墾
田字皆作懇字命國子監刊正攽為直講校正

其謬誤不可勝算然此書世無善本率以己意定之治平三年奏御攷號有史學溫公修通鑑以兩漢事付之

兩漢博聞十二卷

晁氏曰皇朝楊侃纂景德中侃讀兩漢書取其名數前儒解釋為此書以資涉獵者侃嘗編職林此亦其類也

兩漢刊誤補遺十七卷

陳氏曰國子博士吳仁傑斗南撰補三劉之遺也

三國人物論三卷

晁氏曰皇朝楊祐甫撰蜀人

晉書指掌十二卷

晁氏曰皇朝劉蕞編以晉書事實以類分為六十五門

唐書直筆新例四卷

晁氏曰皇朝呂夏卿撰夏卿強記絕人預修新史也其在書局時所建明歐宋間有取焉如增入高祖字叔德之類是也

陳氏曰紀傳志各一卷末一卷摘舊史繁闕又為新例須知附于後略舉名數如目錄之類記新書比舊增減志傳及總類

唐書音訓四卷

晁氏曰皇朝竇革撰新書多奇字觀者必資訓

釋革問學精博發揮良多而其書時有攻革者不知何人附益之也

唐書音義三十卷

晁氏曰未詳撰人比竇氏書大略同而稍簡乃析為三十卷

唐書辨證二十卷

一名糾謬

晁氏曰皇朝吳縝撰縝字廷珩成都人仕至郡守數新書初修之時其失有八類其舛誤二十門凡四百餘事縝不能屬文多誤有詆訶如新書張九齡傳云武惠妃陷太子瑛遣官奴告之曰廢必有與公為援宰相可常處九齡奏之故卒九齡相而太子無患縝以為時九齡已相而

天子竟以廢死以為新書似實而虛按史之文謂終九齡在相位日太子得不廢也豈謂卒以九齡為相太子終無患乎初名糾謬其後改云辯證實一書也

王氏揮塵錄曰嘉祐中詔宋景文歐陽文忠諸公重修唐書時有蜀人吳縝者初登第因范景仁而請于文忠願預官屬之末上書文忠言甚懇切文忠以其年少輕佻拒之縝怏怏而去逮夫新書之成迺從其間指摘瑕疵為糾謬一書至元祐中縝遊宦蹉跎老為郡守與五代史纂誤俱刊行之紹興中福唐吳仲實元美為湖州教授復刻于郡庠且作後序以謂鍼膏肓起廢

疾杜預實為左氏之忠臣然不知續著書之本意也

陳氏曰其父師孟顯於熙豐此書紹聖初上之注唐記十卷

晁氏曰題曰樊先生而不詳其名近代人所著新書紀也

唐書列傳辯證二十卷

陳氏曰端明殿學士玉山汪應辰聖錫撰專攻列傳不及紀志以元祐名賢謂列傳記事毀於鐫削暗於藻繪故隨事辯證之

新唐書略三十五卷

陳氏曰呂祖謙授徒患新史難閱摘要抹出而

門人抄之蓋節本之有倫理者也

唐史要論十卷

一作論斷二卷

晁氏曰皇朝孫甫之翰撰歐陽永叔司馬溫公蘇子瞻稱其書議論精覈以為舊史所不及終於天章閣待制

朱子語錄司馬溫公書孫公唐史後云孫公之翰昔著此書甚自重惜嘗別緘其藁於笥必盥手然後啓之謂家人曰萬一有水火兵甲之急他貨財盡弃之此笥不可失也公私少間則增損改易未嘗去手其在江東為轉運使出行部亦以自隨過亭休止輒取修之會宣州有急變乘駟遽往不暇挈以俱既行之後金陵大火延

及轉運廨舍弟子察親負其笥避於沼中島上
公在宣州聞之亟還入門問曰唐書在乎察對
曰在乃悅餘無所問自壯年至于白首乃成亦
未以示人文潞公執政嘗從公借之
又曰伯恭晚年謂人曰孫之翰唐論勝唐鑑要
之也是切於事情只是大綱却不正了

陳氏曰甫以唐書煩冗遺略多失體法乃修為
唐史用編年體自康定元年逮嘉祐元年成書
七十五卷為論九十二首甫沒朝廷取其書留
禁中其從子察錄以遺温公而世亦罕見蜀有
刻本未有之今惟諸論存焉

唐鑑二十卷

晁氏曰皇朝范祖禹醇夫撰醇夫為温公通鑑
局編修官十五年分掌唐史以其所得著成
此書取武后臨朝二十一年繫之中宗其言曰
此春秋公在乾侯之義也雖得罪於君子有所
不辭觀此則知醇夫之從公決非苟同者凡三
百六篇

朱子語錄曰范太史唐鑑第一段論守臣節處
不圓要做一書補之不曾做得范氏此文字草
草之甚其人資質渾厚說得都如此平正只是
踈多不入理終守臣節處於此亦須有些處置
豈可便如此休了如此議論豈不為英雄所笑
又曰唐鑑有踈處孫之翰唐論精細說得利害

如身親歷之但理不及唐鑑耳又曰唐鑑多說
得散開無收殺如姚崇論擇十道使患未得人
他自說得意不知范氏何故却貶其說又曰唐
鑑白馬之禍歐公論不及此
又曰唐鑑有緩而不精確處如言租庸調及揚
炎二稅之法說得都無收殺只云在於得人
在乎法有這般苟且處它是見熙寧間詳於制
度故有激而言只那有激便不平直
陳氏曰元祐初上此書

唐史評三卷

晁氏曰題曰適適先生不詳何人門人譙孝寧
為編次

五代史纂誤五卷

雜錄一卷

晁氏曰皇朝吳縝撰凡二百餘事皆歐陽永叔
新五代史抵牾舛訛也按通鑑考異證歐陽史
差誤如莊宗還三矢事之類甚衆今此書皆不
及之特證其字之脫錯而已又善本未必皆然
陳氏曰宇文時中守吳興郡庠有二史板遂二
書刻之後皆取入國子監初郡人思溪王氏刻
藏經有餘板以刊二史實郡庠中興監書多闕
遂取其板以往今監本是也

典故辨疑二十卷

儒林郎主管尚書吏部架閣文字李大性撰淳
熙十三年投進自為序略曰仰惟皇朝聖明相

紹明良之懿著在青史坦然明白信以傳信而
纓紳相屬佔畢益繁私史薦興說令蠶午朱紫
苗秀混為一區熙朝盛美未免蒙翳請略舉數
端言之如梅堯臣碧雲駮非堯臣所撰孔平仲
雜錄非平仲所述建隆遺事以王禹偁名而實
非禹偁志恠集括異志倦游錄以張師正名而
實非師正涑水記聞雖出於司馬光而多所增
益談叢雖出於陳師道而多所誤蓋以至王安
石日錄蔡條國史後補又皆不足以取信儒者
俱嘗言之而未之詳辨也矧其言者乎蓋嘗推
其疇品為說滋夥數其差舛不見彈述雖云熾
火之衆於大明何傷於微塵纖埃非全鏡所宜

有也然則丹鉛點勘寤疑辨惑匪書生職歟臣
大懼私史踳駮或為正史之蠹輒擷其事而正
之伏自忖念衡茅之下多未見之書樸櫟之材
無竒特之見固不當自寘于五不韙之域以奸
巖誅而孤忠拳拳所欲辨明懷不能已非敢遠
慕昔人作指瑕糾謬之書以詒攻訶之誚獨取
熙朝美事及名卿才大夫之卓卓可稱而其事
為野史語錄所翳者辨而明之參其歲月曾其
名氏爵位而考證焉其或傳聞異詞難以示信
以意逆志雖知其非而未有曉然依擬則姑置
弗辨其所辨者必得所證而後為之說焉所辨
凡二百條釐為二十卷名之曰典故辨疑

晉武帝命車騎將軍賈充博引羣儒刪采其要
增律十篇其餘不足經遠者為法令施行制度
者為令品式章程者為故事各還其官府搢紳
之士撰而錄之遂成篇卷然亦隨代遺失今據
其見存謂之舊事篇

宋三朝藝文志曰西漢有掌故之吏以主故事
則名之所起不其遠乎魏相為丞相務在奉行
故事孔光領樞機亦守法度修故事耳然則師
古之學當世之要務隋唐載故事數十家皆臺
閣府署舊制及諸遺風曩跡之事今所存惟二
三書又取後之纂類附近者著之
隋志二十五部四百四卷

唐志十七家四十三部四百九十六卷

失名姓
二十五

家裴矩以下不著
錄十六家九十卷

宋三朝志十六部八十六卷

宋兩朝志六部六十三卷

宋四朝志六十四部九百二十卷

宋中興志一百七十家一百八十九部一千九
百九卷

職官

隋經籍志曰古之仕者名書於所臣之策各有
分職以相統治周官冢宰掌建邦之六典而御
史數凡從政者然則冢宰摠六卿之屬以治其
政御史掌其在位名數先後之次焉今漢書百

官表列衆職之事記在位之次蓋亦古之制也
漢末王隆應劭等以百官表不具乃作漢官解
詁漢官儀等書是後相因正史表志無復百僚
在官之名矣搢紳之徒或取官曹名品之書撰
而錄之別行於世宋齊已後其書益繁而篇卷
零疊易為亡散又多瑣細不足可紀故刪其見
存可觀者編為職官篇

隋志二十七部三百三十六卷道計亡書三十
六部四百三十

三卷

唐志十九家二十六部二百六十二卷失姓名
十家六

典以下不著錄二十
九家一百八十一卷

宋三朝志三十四部二百一十三卷

宋兩朝志八部三十二卷

宋四朝志十二部一百三十二卷

宋中興志三十六家四十二部四百一十三卷

刑法

隋經籍志曰刑法者先王所以懲罪惡齊不軌
者也書述唐虞之世五刑有服而夏后氏正刑
有五科條三千周官司寇掌三典以刑邦國司
刑掌五刑之法麗萬民之罪太史又以典法逆
于邦國內史執國法以考政事春秋傳曰在九
刑不忘然則刑書之作久矣蓋藏于官府懼人
之知爭端而輕於犯及其末也肆情越法刑罰
僭濫至秦重之以苛虐先王之正刑滅矣漢初

蕭何定律九章其後漸更增益令甲巳下盈溢
架藏晉初賈充杜預刪而定之有律有令有故
事梁時又取故事之宜於時者為梁科後齊武
帝時又於麟趾殿刪正刑典謂之麟趾格後周
太祖又命蘇綽撰大統式隋則律令格式並行
自律以下世有改作事在刑法志漢律久亡故
事駁議又多零失今錄其見存可觀者編為刑
法篇

唐志二十八家六十一部一千四卷

失姓名家
自開元新格

以下不著錄十三
家三百二十三卷

宋三朝志四十三部六百九十四卷

宋兩朝志三十四部三百七十七卷

宋四朝志一百一十二部一萬七千三百卷
宋中興志八十七家九十四部三千九百三十卷
地理

隋經籍志曰昔者先王之化民也以五方土地
風氣所生剛柔輕重飲食衣服各有其性不可
遷變是故疆理天下物其土宜知其利害達其
志而通其欲齊其政而脩其教故曰廣谷大川
異制人居其間異俗書錄禹別九州定其山川
分其圻界條其物產辨其貢賦斯之謂也周則
夏官司險掌建九州之圖周知山林川澤之阻
達其道路地官誦訓掌方志以詔觀事以知地
俗春官保章以星土辨九州之地所封之域以

觀祿祥秋官職方掌天下之圖地辨四夷八蠻
九貉五戎六狄之人與其財用九穀六畜之數
周知利害辨九州之國使同其貫司徒掌邦之
土地之圖與其人民之教以佐王擾邦國周知
九州之域廣輪之數辨其山林川澤丘陵墳衍
原隰之名物及土會之法然則其事分在衆職
而冢宰堂建邦之六典實摠其事太史以典逆
冢宰之治其書蓋亦摠為史官之職漢初蕭何
得秦圖書故知天下要害後又得山海經相傳
以為夏禹所記武帝時計書既上太史郡國地
志固亦在焉而史遷所記但述河渠而已其後
劉向略言地域丞相張禹使屬朱貢條記風俗

班固因之作地理志其州國郡縣山川夷險時
俗之異經星之分風氣所生區域之廣戶口之
數各有攸叙與古禹貢周官所記相埒是後載
筆之士管窺末學不能及遠但記州郡之名而
已晉世摯虞依禹貢周官作畿服經其州郡及
縣分野封略事業國邑山陵水泉鄉亭道里土
田民物風俗先賢舊好靡不具悉凡一百七十
卷今亡而學者因其經歷並有紀載然不能成
一家之體齊時陸澄聚一百六十家之說依其
前後遠近編而為部謂之地理書任昉又增陸
澄之書八十四家謂之地記陳時顧野王抄撰
衆家之言作輿地志隋大業中普詔天下諸郡

條其風俗物產地圖上于尚書故隋代有諸郡
物產土俗記一百五十一卷區宇圖志二百二
十九卷諸州圖經集一百卷其餘記注甚衆今
任陸二家所記之內而又別行者各錄在其書
之上自餘次之於下以備地理之記焉

隋志一百三十九部一千四百三十二卷通計七

四百四十部一十

唐志六十三家一百六部一千二百九十二卷失姓

名二十一一家李播以下不著
錄五十三家九百八十九卷

宋三朝志九十五部二千三百二十八卷

宋兩朝志二十八部一百八十三卷

宋四朝志四十二部六百七十七卷

宋中興志三百二十二家三百三十六部三千四
百七十一卷

時令

宋中興藝文志前史時令皆入于部農家類惟
中興館閣書目別為一類列之史部以諸家所
載不專為農事故也今從之凡十七家十八部
一百九十九卷

譜系

隋經籍志曰氏姓之書其所由來遠矣書稱別
生分類傳曰天子建德因生以賜姓周家小史
定繫世辨昭穆則亦史之職也秦兼天下刻除
舊跡公侯子孫失其本繫漢初得世本叙黃帝

已來祖世所出而漢又有帝王年譜後漢有鄧氏官譜晉世摯虞作族姓昭穆記十卷齊梁之間其書轉廣後魏遷洛有八氏十姓咸出帝族又有三十六族則諸國之從魏者九十二姓世為部落大人者並為河南洛陽人其中國士入則第其門閥有四海大姓郡姓州姓縣姓及周太祖入關諸姓子孫有功者並令為其宗長仍撰譜錄紀其所承又以關內諸州為其本望其鄧氏官譜及族姓昭穆記晉亂已亡自餘亦多遺失今錄其見存者以為譜系篇

隋志四十一部三百六十卷通計亡書合五十三部一千二百八十八卷
唐志十七家三十九部一千六百一十七卷

宋三朝志五十三部一百五十四卷

宋兩朝志九部六十二卷

宋四朝志十六部七十九卷

宋中興志五十三家五十九部二百二十三卷

目錄

隋經籍志曰古者史官既司典籍蓋有目錄以為網紀體制堙滅不可復知孔子刪書別為之序各陳作者所由韓毛二詩亦皆相類漢時劉向別錄劉歆七略剖析條流各有其部推尋事跡疑即古之制也自是之後不能辨其流別但記書名而已博覽之士疾其渾漫故王儉作七志阮孝緒作七錄並皆別行大體雖準向歆而

遠不逮矣其先代目錄亦多散亡今摠其見存
編為簿錄篇

隋志三十部二百一十四卷

唐志十九家二十二部四百六卷

失姓名二家毋
嬰以下不著錄

十二家一百
十四卷

宋三朝志目錄十六部一百四十一卷

宋兩朝志十一部九十二卷

宋四朝志六部三十卷

宋中興志四十六家五十一部五百二十一卷

史故事

貞觀政要十卷

晁氏曰唐吳兢撰以唐之極治貞觀為最故采

時政之可備勸戒者上之於朝凡四十篇

陳氏曰前題衛尉少卿兼修國史按新舊書列
傳兢未嘗為此官而書亦不記歲月但其首稱

良相傳中安陽公中書令河東公亦未詳為何
人館閣書目云神龍中所進當考

翰林盛事一卷

陳氏曰唐剡尉常山張著處晦撰記儒人盛事
自武德中迄于天寶首載張文成七登科者即

著之祖也

衣冠盛事一卷

陳氏曰唐武功蘇特撰

太和辨謗略三卷

晁氏曰唐李德裕撰先是唐次錄周秦迄隋忠賢罹讒謗事德宗覽之不悅後憲宗以為善命令狐楚等廣之成十卷太和中文成上之

陳氏曰李德裕以令狐楚所著刪其繁蕪益以唐事裁成三卷集賢裴潏為之序元和書今不存邯鄲書目亦止有前五卷

秦傳玉璽譜一卷

陳氏曰題博陵崔逢脩協律郎巖士元重脩河東少尹魏德謨潤色

國璽傳一卷 傳國璽記一卷

陳氏曰傳無名氏所記止唐肅宗記稱巖士元與前大同小異

玉璽雜記一卷

陳氏曰徐景撰乾元元年七月記唐志有徐景玉璽正錄即此書也

楚寶傳一卷

陳氏曰杜確撰肅宗乾元二年楚州尼真如獻寶事

八寶記一卷

陳氏曰無名氏大觀二年

唐文宗朝備問一卷

陳氏曰不著名氏雜錄唐朝典故

通典二百卷

晁氏曰唐宰相杜祐撰先是劉秩採經史自黃

帝迄天寶末制度沿革廢置論議得失倣周禮
六官法為政典三十五篇房瑄稱才過劉向祐
以為未盡因廣之參以新禮為二百篇以食貨
選舉職官禮樂刑法州郡邊防八門分類叙載
世推該洽三十六年成書德宗時上之
續通典二百卷

陳氏曰翰林學士承旨大名宋白太素等撰咸
平三年奉詔四年九月書成起唐至德初迄周
顯德末王欽若言杜佐通典上下數千載為二
百卷而其中四十卷為開元禮今之所載二百
餘年亦如前書卷數時論非其重復

國朝通典二百卷

陳氏曰不著名氏或言魏鶴山所為似方草創
未成書也凡通典會要前書及館閣書目皆列
之類書按通典載古今制度沿革會要專述典
故非類書也

唐會要一百卷

晁氏曰皇朝王溥撰初唐蘇冕叙高祖至德宗
九朝沿革損益之制大中七年詔崔鉉等撰次
德宗以來事至宣宗大中之年以續冕書傳又
採宣宗以後事共成百卷建隆二年二月奏御
詞簡禮備太祖覽而嘉之詔藏於史閣

陳氏曰按唐志蘇冕會要四十卷續會要四十
卷楊紹復等撰崔鉉監脩而會要稱杭州刺史

蘇弁與兄冕續國朝故事為是書弁聚書至二萬卷次於集賢芸閣

五代會要三十卷

晁氏曰皇朝王溥等撰采梁至周典故纂次建隆初上之

三朝國朝會要一百五十卷

晁氏曰皇朝章得象天聖中被詔以國朝故事因革制度編次宋綬馮元李淑王舉正王洙同脩得象監摠慶曆四年書成上之

六朝國朝會要三百卷

晁氏曰神宗朝以會要止於慶曆命王珪續之起於建隆之元迄于熙寧十年通舊書增損成

是書摠一十一類八百五十八門其間禮樂政令之大綱儀物事為之細目有關討論顧無不載文簡事詳一代之典備矣

節國朝會要十二卷

晁氏曰皇朝范師道以章得象書繁多節其要以備檢

續會要三百卷

陳氏曰監修仙井虞允文并甫等上自紹興十年編修起元豐元年迄靖康之末軋道六年書成

巽齋李氏序略曰徽宗初詔王覲曾肇續編元豐至元符尋復詔起治平四年止崇寧五年凡

四十年二書皆弗克成政和末有司獨生帝系
后妃吉禮三類摠一百一十卷其書則通章得
象王珪所編稍益以熙寧後事而此三類外皆
宋皇暇運遭百六史記放絕光堯壽聖太上皇
帝甚憫焉紹興九年詔館職續編三十一年又
降趣旨然闕簡破牘掇落匪易皇帝陛下纂修
洪緒敷時繹思更命宰臣提舉閱再歲乃克成
書斷自神宗之初迄于靖康之末凡六十年摠
三百卷分二十一類六百六十六門竊惟五朝
大政前書備載類仍舊章鮮所開創逮神哲徽
欽之御世因時適變道與前異大抵革于熙寧
復于元祐旋革于紹聖又復于元符再革遂臻

崇觀政宣之豐豫以及靖康六十年間業廣事
詳方策所記視前倍徙今茲綴集於零落散亡
之餘十僅得其六七誠不足允符神旨然科條
粗舉部類各分禮樂兵財之大原儒術刑法之
要指取賢歛才之品式設官分職之制度九州
之別合四夷之服叛槩見于斯凡厥討論尚或
有取容齋洪氏隨筆曰國朝會要自元豐三百
卷之後至崇寧政和間復置局修纂宣和初王
黼秉政罷修書五十八所時會要已進一百十
卷餘四百卷亦成但局中欲節次覲賞故未及
上既省是命局官以謂若朝廷許立限了畢不
過三兩月可以投進而黼務悉矯蔡京所為故

一切罷之官吏既散文書皆為棄物矣建炎三年外舅張淵道為太常博士時禮寺典籍散佚亡幾而京師未陷公為宰相言宜遣官往訪故府取見存圖籍悉輦而來以備掌故此若緩而甚急者也宰相不能用其後逆豫竊擬鞠為煨燼吁可惜哉

中興會要二百卷

陳氏曰監修晉江梁克家叔子等上乾道六年既進續會要有旨自建炎元年續修正紹興三十三年九月成書

國朝會要摠類五百八十八卷

陳氏曰李心傳所編合三書為一刻於蜀中其

板今在國子監

三朝聖政錄十卷

晁氏曰皇朝富弼上言乞選官置局將三朝典故編成一書即命王洙余靖孫復歐陽脩編修分別事類成九十六門

陳氏曰其書初名大平故事凡九十六門每事之後各釋其意至紹興八年右朝議大夫呂源得舊印本刊正增廣名政要釋明策備上之於朝館閣書目指政要為寶訓非也

三朝寶訓三十卷

陳氏曰翰林學士李洙等撰天聖五年監修國史青社王曾奏乞用唐吳兢正觀政要故事取

三朝聖語政事及臣僚奏對不入正史者別為一書與國史實錄並行至十年書成詔以寶訓為名其後進讀於邇英今館閣書目以為二十卷富弼所上者非也乃政要耳

王氏揮麈錄曰仁宗即位方十歲章獻明肅太

后臨朝章獻素多知謀分命儒臣馮章靖元孫

宣公爽宋宣獻綬等采摭歷代君臣事迹為觀

文覽古一書祖宗故事為三朝寶訓十卷每卷

十事又纂郊祀儀仗為鹵簿書三十卷詔翰林

待詔高克明等繪畫之極為精妙叙事于左令

傳母輩日夕侍上展玩之解釋誘進鏤板于禁

中元豐末哲宗以九歲登極或有以其事啓于

宣仁聖烈皇后者亦命取板摹印倣此為帝學之權輿分錫近臣及館殿時大父亦預其賜明家因有之紹興中為秦伯陽所取

三朝訓鑒圖十卷

陳氏曰學士李淑楊偉等修纂慶曆八年偉初奉旨檢討三朝事迹乞與泚共編且乞製序皇祐元年書成頃在莆田有售此書者亟求觀之則已為好事者所得蓋當時御府刻本也卷為一冊凡十事事為一圖飾以青赤亟命工傳錄凡字大小行廣狹設色規模一切從其舊歛柩鋪觀如生慶曆皇祐間目睹聖作明述之盛也按館閣書目載此書云繪采皆闕至續書目乃

云得其全未如果當時刻本乎抑亦摹傳也
按三朝寶訓一書直齋書錄解題以為宰相王曾奏請編修成於天聖十年凡三十卷揮塵錄以為章獻命儒臣所修成於天聖初年凡十卷殊不相脗合然揮塵錄所言禁中刻本且有繪圖則似即此三朝訓鑒圖十卷之書然直齋以此書為慶曆皇祐時所修纂則又與揮塵錄所謂仁皇初年傅母輩侍上展玩之語采不合矣當俟考訂精者質之

仁宗政要四十卷

晁氏曰皇朝張唐英撰

仁皇訓典六卷

陳氏曰翰林侍講范祖禹撰元祐八年經筵所上凡三百十七條大略亦用寶訓體

兩朝寶訓二十卷

陳氏曰禮部郎中長樂林希子中編進用天聖故事也元豐六年表上

神宗寶訓二十卷

晁氏曰皇朝林處撰處希之姪也剽聞神宗聖政輒稱記錄分一百門以續五朝寶訓崇寧上于朝

歷代年號并宮殿等名一卷

陳氏曰丞相饒陽李昉明叔在翰苑時所纂

朝制要覽五十卷

陳氏曰屯田郎中宋或撰此書傳於陸放翁書其後曰先君會稽公晚歲喜觀間為子弟講論因革率至夜分會稽公者宰元鈞也其書作於嘉祐中皆國初故實觀之使人有感焉

景德會計錄六卷

鼎氏曰皇朝丁謂謂之撰謂景德中纂三司戶口稅賦之入及兵合吏祿之費會計天下每歲出納贏虧之數書成奏御

陳氏曰謂時為三司使序言歲收兩京十七路帳籍四萬四百有七出入疾徐事一千五百文移倍之以李吉甫國計簿賈耽國要圖摠其目

得四十列為六卷一戶賦二郡縣三課入四歲用五祿食六雜記大抵取景德中一年為準皇祐會計錄六卷

晁氏曰皇朝田况元鈞撰况兩為三司使謂夏戎阻命之後增兵比之景德幾一倍加之吏負益繁經費日侈民力日疲乃約丁謂會計錄以皇祐財賦所入多於景德而其出又多於所入著成此書上之庶幾朝廷稽祖宗之舊省浮費以裕斯民云

陳氏曰元鈞做景德之舊取一歲最中者為準又為儲運一篇以補其闕

春明退朝錄三卷

陳氏曰龍圖閣學士常山宋敏求次道撰所記多故實其父宣獻公綬居第在春明坊如晁氏稱昭德也

先朝政範一卷

陳氏曰直集賢院祖徠石介守道編進自任將至悔過凡十二篇

尊號錄一卷

丞相安陸宋庠公序撰大意以為徽號夸詡非古而我祖宗往往謙遜不居猶願超然遠覽盡屏前號其愛君以德者歟至神宗遂却不受至于今行之

輔弼名對四十卷

天禧中前進士劉顏編自漢迄五代為四十門

青社賑濟錄一卷

丞相富文忠公弼青州救荒施行文牘也

元豐問事錄二卷

光祿事丞李德芻撰德芻邯鄲李泚之子元豐中為詳定官制檢討文字詔旨所問奏藁錄為此書

官制局紀事一卷

李德芻奉旨編錄置局以來命官等事

中書備對十卷

晁氏曰皇朝元豐三年畢仲衍承詔編次曰周官所謂要會者正今日中書所宜有自漢至唐

莫知議此今編成十卷凡一百二十五門附五十八事李清臣嘗與許將書云備對乃吳正憲公居宰路以聖問多出意表故令中書掾畢君為之其時預有畫旨諸司遇取會不許濡滯如此尚歷數年乃就後多有改革然事亦可槩見也

蔣魏公逸史二十卷

容齋洪氏隨筆曰蔣魏公逸史穎叔所著也多記當時典章文物之舊有數百冊兵火間盡失之其曾孫芾始捃撫遺藁而成此書將以奏御以其副上之太史且板行之傳之天下後世既而不果蔣公在熙寧元祐崇寧時為博聞強識

然閱其論述頗有可議恨不及丞相在日與之

言

大槩辨訂官制之訛誤也

呂申公掌記一卷

陳氏曰丞相申國呂公著晦叔撰在相位所記人材已用未用名姓及事當行已行條目

元祐榮觀集五卷

陳氏曰左朝奉大夫權大學正汪洙撰記元祐六年視學本末并羣臣所上詩賦頌表之類張舜民芸叟為之序

秦陵故事二十卷

陳氏曰不著名氏皆叙宣仁臨朝九年中制誥表章奏議之屬

尊堯錄八卷

陳氏曰延平羅從彥仲素撰從彥師事楊時而李侗又師從彥所謂南劍三先生也從彥當靖康初為以本朝之禍起於熙豐不遵祖宗故實故采四朝事為此錄又李沆寇準王旦王曾杜衍韓琦范仲淹富弼司馬光程顥名輔巨儒十人言行附于其後末有別錄一卷專載司馬光論王安石陳瓘論蔡京奏疏欲上之朝不果嘉定中太守劉元濟得其書奏之且為板行

本朝事實三十卷

陳氏曰右承議郎李伋撰雜錄故事不成條貫統紀

皇朝治迹統類七十三卷

陳氏曰眉山彭百川叔融撰略用表樞通鑑本末條例為前集四十卷中興後事為後集三十三卷

皇朝事類樞要二百五十卷

陳氏曰蜀人張和卿編集為一百五十門蓋舉子答策之具也

長樂財賦志十六卷

陳氏曰知漳州長樂何萬一之撰往在鄞學訪同官薛師雍子然几案間有書一編大略述三山一郡財計而累朝詔令申明沿革甚詳其書雖為一郡設於天下實關通問所從得薛曰外

舅陳止齋修圖經欲以為財賦一門後緣卷秩多不果入因借錄之書無標目以意命之曰三山財計本末及來莆田謂鄭寅子敬道之鄭曰家有何一之長樂財賦志豈此耶復借觀之良是其間亦微有增損末又有安撫司一卷併抄錄附益為全書

內治聖監二十卷

陳氏曰起居舍人兼嘉王府贊讀清江彭龜年子壽撰取列聖脩身齊家教子訓齊宗室防制外戚宦官贊御等事以紹熙五年表上之光宗稱善且曰祖宗家法最善漢唐不及也

高宗聖政草一卷

陳氏曰陸游在隆興初奉詔修高宗聖政草創凡例多出其手未成而去私篋不敢留藁他日追記得此錄之而書其後凡二十條

高宗孝宗聖政編要二十卷

陳氏曰高宗聖政五十卷孝宗聖政五十卷乾道淳熙中所修皆有御製序此二秩書坊抄節以備舉子應用之儲也

孝宗聖政十二卷

陳氏曰亦書坊抄節比前為稍詳

按孝宗聖政係陳止齋奉詔擬御製序言起初潛至內禪掇其最凡得六百四十一條為五十卷紹興三年序

會稽和買事宜七卷

陳氏曰浙東帥番易洪邁景盧提舉常平三山鄭湜補之集初承平時預買令下守越者無遠慮凡一路州縣所不受之數悉受之故越之額特重以匹計者十四萬六千九百居浙東之半人戶百計規免皆詭為第五等戶而四等以上戶之害日益甚於是有所頭均科之說者帥鄭丙少嘉憲丘密宗卿張詔君卿頗主之由淳熙十一年以後略施行而議者多以荆科五等戶為不便參政李彥穎秀叔尚書王希呂仲行先後帥越皆言之而王畫八事尤力會光廟亦以為貽窮貧之害戶部尚書葉翥叔羽奏乞先

減四萬四千餘匹止以十萬為額而後均敷詔從之仍令侍從集議皆乞關併詭挾遂詔邁湜措置既畢以施行次第類成此書時紹熙元年也

劉忠肅救荒錄五卷

陳氏曰王居仁撰淳熙乙未樞密劉珙共父帥江東救荒本末嘉定乙亥真景元刻之漕司以配韓富公青社之編而以劉公行狀謚議附于後

西漢會要七十卷東漢會要四十卷

武學博士清江徐天麟仲祥撰以二史所載漢家制度典章散於紀傳表者倣唐以來會要體

分門編纂其用力勤矣其言范曄志藁為謝儼
蠟以覆車劉昭因曄遺緒註而補之夫既曰蠟
以覆車安得復有遺緒蓋未考昭之所著實司
馬紹統續漢書志也仲祥乙丑進士世有史學
其世父夢莘商老著北盟會編父得之思叔為
左氏國紀兄筠孟堅作漢官考皆行於世

漢制叢錄三十三卷

袁夢麟應祥撰以二漢所紀典故分門編類凡
二十五門

平陽會四卷

通直郎知平陽縣汪季良子駟撰平陽號難治
為浙東三陽之冠季良治有聲乃以一邑財計

自兩稅而下為二十一篇終於歲會旁通沿革
本末大略備矣又為外篇五條如砧基副本催
科檢放及書手除科數之類以為此財用所從
出也季良端明應辰之孫佳士且能吏也得年
不求士論惜之

唐昌記二卷

知昌化縣趙希克家撰

錢譜十卷

晁氏曰右梁顧烜嘗撰錢譜一卷唐張台亦有
錢錄兩卷皇朝紹聖間孝美以兩人所纂并

錯增廣成十卷分八品云

貨泉錄一卷

晁氏曰右皇朝陶岳撰記五代諸侯擅改錢幣
之由幽州嶺南福建湖南江南五國

續錢譜十卷

晁氏曰右皇朝董道撰道之祖嘗得古錢百令
道考次其文譜之以前世帝王世次為序且言
梁顧烜唐封演之譜浸汗蔽固不可用其譜自
太昊葛天氏至堯舜夏商皆有錢幣其穿鑿誕
妄至此

泉志十五卷

陳氏曰洪遵景伯撰記歷代錢寶

浸銅要略一卷

陳氏曰張甲撰稱德興草澤紹聖元年序蓋膽

水浸鉄成銅之始甲參政子公之祖

治金錄一卷

陳氏曰泉司吏所為也

鄭夾漈通志略

莆田鄭樵漁仲撰淳熙間撰進自序略曰江淹有
言修史之難無出於志誠以志者憲章之所係
非老於典故者不能為也不比紀傳紀以年包
事傳以事繫年儒學之士皆能為之惟有志難
其次莫如表所以范曄陳壽之徒能為紀傳而
不敢作表志志之大原起於爾雅司馬遷曰書
班固曰志蔡邕曰意華嶠曰興張勃曰錄何法
盛曰說餘史並承班固謂之志皆詳於浮言略

於事實不足以盡爾雅之義臣今摠天下之大
學術而條其綱目名之曰略凡二十略百代之
憲章學者之能事盡於此矣其五略漢唐諸儒
所得而聞其十五略漢唐諸儒所不得而聞也
曰氏族略六書略七音略天文略地理略都邑
略謚略器服略樂藝文略校讎略圖譜金石略
灾祥略昆虫草木略凡十五略出臣胸臆不涉
漢唐諸儒議論曰禮略職官略選舉略刑罰略
凡前五略雖本無前人之典亦非諸史之文也
按鄭氏此書名之曰通志其該括甚大卷
首序論譏詆前人高自稱許蓋自以為無
復遺憾矣然夷考其書則氏族六書七音

等略考訂詳明議論精到所謂出臣曾臆
非諸儒所得聞者誠是也至於天文地理
器服則失之太簡如古人器服之制度至
詳今止樽壘一二而謂之器服略可乎若
禮及職官選舉刑罰食貨五者則古今經
制甚繁沿革不一故杜岐公通典之書五
著居十之八然杜公生貞元間故其所記
述止於唐天寶今通志既自為一書則天
寶而後宋中興以前皆合陸續銓次如班
固漢書續史記武帝以後可也今通志此
五略天寶以前則盡寫通典全文略無增
損天寶以後則竟不復陸續又以通典細

注稱為已意附其旁而亦無所發明

此通志五

略中所謂臣按云云此一 踈略如此乃自

謂雖本前人之典而亦非諸史之文不亦

誣乎夾漈譏司馬子長全用舊文間以里

俗采撫未備筆削不遑又譏班孟堅全無

學識專事剽竊自高祖至武帝七世盡竊

遷書不以為慚至其所自為書則不堪檢

點如此然則著述豈易言哉

又按此書刊本元無卷數止是逐略分為

二二耳中興四朝藝文志別史類載通志

二百卷其後叙述云中興初鄭樵采歷代

史及它書自三皇迄隋為書曰通志倣遷

固為記傳而改表為譜志為略則其為書

似是節抄刪正歷代之正史如高峻之小

史蘇子由之古史而非此二十略之書也

但二十略序文後言於紀傳即其舊文從

而損益制誥書疏

別錄唐書五代史本朝大臣所修非微臣

敢議故紀傳及隋若禮樂刑政務存因革

固引而至唐云則亦略言其作書之意豈

彼二百卷者自為一書亦名之曰通志而

於此序附言其意耶或併二十略共為一

書耶當俟續考

